



## Pijanice (Ili kako bi svi pili, ali niko ne bi da plati...)

**N**eko mi je nekada rekao kako je prvi znak da čovjek (malo intenzivnije) stari, onaj po kojem nam vrijeme sve brže i brže prolazi. Kako mi brzo dolazi novi broj našeg lista, počinjem se baš brinuti... Helem - izbori su gotovi i sada bi se - po logici stvari - trebali uhvatiti posla. Ali kako neko lijepo reče - tamo gdje prestaje logika, počinje Bosna, a ja bih dodala i (naročito) Hercegovina. Znači od posla uglavnom ništa, a kako u BiH i nema politike osim vanjske politike, stranci će nam i dalje, i uglavnom s pravom, soliti pamet i zavrtati ruke, a ako se stvari baš počnu otimati kontroli, navući će nam ludačku košulju iz koje smo se taman počeli izvlačiti. Zašto, dakle, NAMA trebaju reforme?

Situacija u komšiluku nije nimalo dobra - Hrvatska je još uvijek u recesiji sa vrlo lošom prognozom bliske ekonomske budućnosti. A ako je suditi po količini sholastičkih afera koje se skoro svakodnevno dešavaju, situacija će biti i gora (samo da podsjetim - sholastika je otprilike disciplina koja stotina-ma godina pokušava - neuspješno doduše - dati odgovor npr. na pitanje koliko šejtana može stati na vrh igle... Što će reći - hem odgovora nema, a i da ga ima, bio bi beskoristan). Ne vidim, naime, kako će sholastička rasprava o tome ko je sve sjedio na sjednicama na kojima se npr. odlučivalo o prodaji INA-e, pomoći da ta ista kompanija plati milionske iznose poreza i akciza koje duguje Hrvatskoj i kojoj već ozbiljno prijeti bankrot. Kakve bi to posljedice imalo na BiH i na poslovnom, a Boga mi i na političkom planu, ne volim ni misliti... U Srbiji, pak, dinar klizi naniže, ali ako ništa - bar su statistički izašli iz recesije.

Mi za sada, moram primjetiti, prilično dobro teturamo. Baš kada pomislim da ćemo pasti, naleti neka taraba u vidu tranše MMF-a ili neke brzinske prodaje državne/entitetske imovine. U prevodu - drži vodu dok majstori odu... A najgore za nas tek dolazi - prispjevaju tranše za vraćanje potrošenog, a jedini način da obezbjedimo novce za to, jeste rezanje javne potrošnje. A to, bojim se, nije moguće bez reformi.

I to me podsjetilo na moj razgovor s jednim bivšim visokopozicioniranim političarem koji je učestvovao u pregovaranju i oblikovanju Vašingtonskog sporazuma kojim je stvorena Federacija BiH, a bio je i u Daytonu gdje je postavljena sadašnja ustavna struktura zemlje. Na moje jednostavno pitanje - da li je **IKADA IKO** tokom tih pregovora pokušao, bar onako, što se kaže, šabački na olovku, sračunati koliko će ta projektirana državna struktura koštati - samo me je pogledao kao da sam pala s Marsa i mrtvo hladno odgovorio da nije. (Uzgred, kada je dotičnom pukla žuč, onda je hitno prebačen u Klinički centar u Sarajevu - pored "žive" bolnice u Novoj Biloj. Kako mi je ozbiljno pojasnio - on jeste patriota, ali ne baš toliki - Sarajevo je ipak Sarajevo, a Nova Bila je za široke narodne mase...).

I tako me ova naša BiH podsjeća na kafanu punu pijanica... Svi, naime, volimo piti, ali je problem u tome što se na kraju ipak sve **MORA** platiti... Pa ne recite da ne ličimo na alkoholičara iliti pijanicu koja mahmuruluk od sinoć liječi mehkrom rakijom... **II**

Aida Delić,  
Glavna i odgovorna urednica